

En memoria da Tresa Maissen-Loretz, 1919–2011



Tresa Maissen-Loretz ei naschida ils 13 da zercladur 1919 egl uclaun da Selva sco feglia da Michel e Maria Loretz -Deflorin. Ella ei stada il 6avel affon da 12 fargliuns. Sco suletta buoba eis ella carschida si cun 11 frars ed ha aschia beingleiti stuiu segidar el tenercasa. La mumma Maria ha giu da sbatter cun la sanadad, aschia che la lavur ei carschida incontin. Sco giuvna eis ella serendida a Segnas en piazza sco fumitgasa. Leu ha ella era empriu d'enconuscher Battesta Maissen, cun il qual ella ei sespusada igl onn 1944. Gronda legria ella lètg han las duas feglias Veronica e Dora purtau. Sper la famiglia ei la Tresa era segidada cumpleinamein el menaschi

puril. Denteren ha ella luvrau el hotel Alpina a Sedrun. Da lezzas uras udeva quei menaschi alla firma Loretz che vegneva tgamunada da siu frar Gaudenz. Ina gronda frida munta la mort da siu um Battesta igl onn 1977. La Tresa ei restada a Segnas ed ha giu biars onns quitau da siu vischin Toni Maissen. Ils onns vargan e cun la vegliadetgna laian era las forzas suenter plaunsiu. Igl onn 2003 sedecida ella da serender ella Tgèsa s. Vigeli a Sedrun. Aschia eis ella stada pli datier da sias feglias Veronica e Dora che han giu grond quitau da lur mumma. Ella selegrava dils biadis e sutbiadis ed era schiglioc dallas visetas. Aschiditg che las forzas han lubiu mava ella bia e bugen a spass.

Gia daditg ei la Tresa stada maldisposta. La sonda sera, ils 19 da fevrer eis ella vegnida deliberada dils mals e dil pitir ed ha astgau bandunar il terrester. Nus tuts astgein esser engrazievels per ils bials onns che nus havein astgau passentar ensemen. Anavos restan nunemblideivlas regurdientschas. Sia buntadeivladad e carezia salvein nus per adina en nos cors.